

CONVENIO DE COLABORACIÓN ENTRE A CONSELLERÍA DE CULTURA, EDUCACIÓN E UNIVERSIDADE DA XUNTA DE GALICIA E A COMUNIDADE CISTERCIENSE DO DIVINO SALVADOR DE FERREIRA DE PANTÓN (LUGO) PARA A POSTA A DISPOSICIÓN DOS TERREOS E INMOBLES NECESARIOS PARA A EXECUCIÓN DAS OBRAS DE RESTAURACIÓN DAS CUBERTAS DO MOSTEIRO DE FERREIRA DE PANTÓN: CLAUSTRO, CASA DAS DONAS E OUTRAS PUNTUAIS.

Santiago de Compostela, 26 ABR. 2022

REUNIDOS

Dunha parte, D. Román Rodríguez González, actuando en representación da Consellería de Cultura, Educación e Universidade, en virtude do seu cargo de conselleiro, en exercicio das facultades que lle confire o artigo 34 da Lei 1/1983, de 22 de febreiro, reguladora da Xunta e da súa Presidencia, así como o artigo 2º da Resolución de 8 de abril de 1991, pola que se fai público o acordo do Consello da Xunta de Galicia de 27 de marzo de 1991 sobre convenios de cooperación con outros entes públicos e de colaboración con particulares.

Doutra, D^a. Teresa Marcos Martínez, actuando en representación da Comunidade Cisterciense do Divino Salvador de Ferreira de Pantón (Lugo), en virtude da súa condición de Superiora, con plena potestade como administradora, nomeada pola Abadesa Presidenta da Congregación Cisterciense de San Bernardo, con data 19 de xuño de 2016.

Todas as partes teñen plena capacidade para levar adiante o presente convenio de cooperación e por tanto,

EXPOÑEN

Primeiro:

Que a Xunta de Galicia asume a xestión das funcións sobre o patrimonio cultural en virtude do Real decreto 2434/1982, do 24 de xullo, sobre traspaso de funcións do Estado á Comunidade Autónoma de Galicia en materia de cultura, de acordo co establecido no artigo 27.18 do Estatuto de Autonomía, en consonancia co estipulado no artigo 148.1.16 da Constitución Española, ámbito desenvolvido na Lei 5/2016, do 4 de maio, do patrimonio cultural de Galicia.

Segundo:

Os apartados 1) e 2) do artigo 198 da Lei 5/1997, do 22 de xullo, de administración local de Galicia establecen que as administracións públicas galegas axustarán as súas relacións aos principios de colaboración, cooperación, auxilio, coordinación e respecto aos correspondentes ámbitos competenciais, garantíndose a máxima eficacia nas xestións administrativas, podendo subscribir

Teresa Marcos Martínez



convenios de cooperación entre si, segundo o disposto no artigo 198 da mesma lei. Do mesmo xeito, o artigo 3.2 da Lei 5/2016, do 4 de maio, do patrimonio cultural de Galicia, encomenda aos concellos a obriga de protexer, difundir e fomentar o valor cultural dos bens do patrimonio cultural de Galicia que se localicen no seu ámbito territorial.

Terceiro:

O mosteiro de Ferreira de Pantón, Lugo, está protexido polo seu valor cultural ao ter a consideración de ben de interese cultural (51-0004180-00000) segundo o que establece o Decreto 2495, do 23 de agosto, polo que se declara monumento, (BOE núm. 254 do 23.10.1975). Asemade o mosteiro atópase no ámbito da paisaxe cultural da Ribeira Sacra, declarada ben de interese cultural polo Decreto 166/2018, do 27 de decembro (DOG núm. 248 do 31.12.2018).

O mosteiro de Ferreira de Pantón é o único en Galicia que dende a súa fundación segue cumprindo como cenobio feminino. De orixe bieito, acóllese á reforma do Císter.

En canto a súa arquitectura o elemento máis sobresaínte é a igrexa do século XII, dunha única nave con cabeceira de dous tramos, sendo o posterior semicircular. A nave cóbrese con artesoado de madeira a excepción da cabeceira onde a cubrición se realiza con bóveda de medio canón rematada en cuarto de esfera no presbiterio e na capela maior. Este último ten como particularidade que está reforzado por nervios que converxen ao centro do arco divisorio dos dous tramos da ábsida. Neste espazo destaca a profusa decoración, vinculada ao facer de Cluny, sendo os capiteis do arco triunfal en pedra calcaria e os arcosolios apuntados, onde a finais do século XV se colocaron os sepulcros de Diego de Lemos e Lope de Lemos.

A partir do século XVI iníciase a reforma do resto do dormitorio monacal, polo que se poden establecer varias fases como o claustro renacentista ou a muralla de peche onde está representado o brasón da Congregación cisterciense, datado no século XVIII.

A fachada do mosteiro orientada ao leste forma ángulo recto coa da igrexa. Esta fachada é barroca, do 1728, con dous corpos de ventás rectangulares recercadas e enreixadas, as superiores máis grandes. A portada encóntrase no primeiro corpo, cunha porta de arco rebaixado entre dúas pilastras rematadas por un frontón triangular partido. A cornixa levántase sobre a portada, enmarcando o escudo real, coroado por un frontón curvo con tres pináculos. Á dereita destaca un torreón de harmoniosas proporcións, cunha gran galería superior de tres arcos por lado. Unha escaleira pegada á súa fachada dá acceso á antiga capelanía, hoxe hospedaxe recentemente rehabilitada, que discorre paralela á igrexa cunha ampla solaina orientada ao sur.

Teresa Marcos Martínez



No lado oposto do conxunto sitúase a denominada “Casa das Donas”, onde se aloxaban as damas da nobreza que tomaban os hábitos, con habitacións e cociñas individuais sobre as que se situaban as das súas criadas cunhas pequenas ventás sobre os balcóns das donas. No exterior, as repetidas e monumentais chemineas reflicten esta primitiva disposición e conceden un orixinal aspecto a esta zona do mosteiro.

As restantes dependencias monacais organízanse en torno ao claustro regular, o único do mosteiro, tamén rehabilitado recentemente. De planta rectangular, é claramente renacentista seguramente de mediados do século XVI, cun primeiro corpo de grandes arcos de medio punto sobre columnas exentas con capiteis de catro volutas. O segundo corpo recuperou a estrutura orixinal de linteis e zapatas sobre pilastras, cos ocos acristalados. A súa fachada oeste, de aparello irregular, é do 1782.

Cuarto:

Na actualidade varias estancias do mosteiro teñen filtracións de auga procedentes da cuberta que están deteriorando tanto as propias estancias coma a estrutura de madeira de soporte da cuberta. É preciso actuar tamén sobre os elementos escultóricos da fachada principal que están deteriorados.

A antiga cociña está formada por unha gran lareira central, forno, alacena e unha monumental despensa. Este espazo está en desuso desde fai tempo e o mal estado das cubertas desta zona provocou unha deterioración xeneralizada nesta estancia. Nunha actuación anterior arranxouse a cuberta e agora o obxectivo é recuperar o interior deste espazo.

A zona verde do claustro precisa dunha reparación e renovación que permita un mellor mantemento e conservación.

Para realizar a execución destas obras de restauración é preciso realizar un convenio coa Comunidade Cisterciense do Divino Salvador de Ferreira de Pantón (Lugo), para a posta a disposición dos terreos e inmobles obxecto desta actuación.

Por todo o exposto, as partes acordan subscribir un convenio de colaboración baseado nas seguintes

CLÁUSULAS

Primeira.- Obxecto do Convenio



Teresa Marcos Martínez

O obxecto do presente convenio de colaboración é regular as bases de colaboración entre a Xunta de Galicia, a través da súa Consellería de Cultura, Educación e Universidade, e a Comunidade Cisterciense do Divino Salvador de Ferreira de Pantón (Lugo) para a **posta a disposición dos terreos e inmobles necesarios para a execución das obras de restauración das cubertas do Mosteiro de Ferreira de Pantón: Claustro, Casas das Donas e outras puntuais.**

Para o desenvolvemento deste proxecto non é posible promover a concorrència pública, xa que as obras de intervención previstas, están incluídas no *Plan estratéxico para a protección e conservación do patrimonio cultural de Galicia* da Dirección Xeral do Patrimonio Cultural, dentro do obxectivo operativo "Conservar o patrimonio cultural galego, que inclúe actuacións en catedrais, mosteiros, conventos, abadías, igrexas e patrimonio eclesiástico galego".

Segunda.- Obrigas da Consellería de Cultura, Educación e Universidade

A Consellería de Cultura, Educación e Universidade da Xunta de Galicia, dentro das liñas de actuación que en materia de protección, conservación e posta en valor do patrimonio cultural, están sinaladas no seu programa de obxectivos, realizará as actuacións oportunas para a execución das obras de restauración das cubertas do Mosteiro de Ferreira de Pantón: Claustro, Casas das Donas e outras puntuais, con cargo aos orzamentos xerais da Comunidade Autónoma de Galicia en función das súas dispoñibilidades económicas e en consonancia co disposto nos artigos 1 e 3 do Decreto 246/1992 da Consellería de Economía e Facenda (DOG núm. 159 do 17 de agosto de 1992).

Terceira.- Obrigas da Comunidade Cisterciense de do Divino Salvador de Ferreira de Pantón (Lugo).

Pola súa banda, a Comunidade Cisterciense de do Divino Salvador de Ferreira de Pantón, comprométese a autorizar a plena e libre dispoñibilidade dos terreos e inmobles necesarios a favor da Consellería de Cultura, Educación e Universidade para que esta poida acometer a execución das actuacións obxecto do presente convenio. Esta libre dispoñibilidade será realizada, segundo o establecido no Decreto 246/1992, do 30 de xullo, da Consellería de Economía e Facenda. Así mesmo, será o responsable de aprobar o documento técnico das actuacións e conservar e xestionar o acceso aos restos no ámbito dos terreos da súa titularidade.

Cuarta.- Comisión Paritaria

Coa finalidade de asegurar o cumprimento do presente convenio, créase unha comisión mixta de seguimento e control, integrada por:

1. Dous (2) representantes da Xunta de Galicia

Teresa Marcos Martínez

2. Dous (2) representante da Comunidade Cisterciense de do Divino Salvador de Ferreira de Pantón (Lugo).

Quinta.- Resolución

O presente convenio resolverase polo incumprimento total ou parcial dalgunha das cláusulas que o regulan.

Sexta.- Vixencia

O presente convenio entrará en vigor o día da súa sinatura e estará vixente ata a finalización das obras obxecto do mesmo, prevista para o 31 de decembro de 2022 e, en todo caso, ata a finalización da intervención.

En todo caso, a duración máxima prevista non poderá ser superior aos catro anos, salvo que normativamente esté previsto un prazo superior, de acordo co artigo 49 apartado h) da Lei 40/2015, do 1 de outubro, de Réxime Xurídico do Sector Público.

Sétima: Publicidade do convenio

As partes asinantes deberán cumprir coas obrigas derivadas da entrada en vigor da Lei 1/2016, do 18 de xaneiro, de transparencia e bo goberno. Para tal fin, as partes aceptan que o texto do convenio se publique no Portal de Transparencia e Goberno Aberto da Xunta de Galicia incluíndo os datos identificativos das persoas asinantes.

Asemade procederáse á inscrición do convenio no Rexistro de Convenios, de conformidade co establecido no artigo 5 do Decreto 126/2006, do 20 de xullo, polo que se regula o Rexistro de Convenios da Xunta de Galicia.

Oitava: Notificación electrónica

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e, os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notific@, <https://notifica.xunta.gal>. Para poder acceder a unha notificación electrónica, o interesado deberá contar cun certificado electrónico asociado ao NIF que figure

Teresa Marcos Martínez



como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

Novena.- Réxime Xurídico

Este convenio ten natureza administrativa. As cuestións litixiosas xurdidas da aplicación do presente convenio, e non resoltas en vía administrativa, serán resoltas pola xurisdición contencioso-administrativa.

E en proba de conformidade cos termos do presente convenio, as partes comparecentes asínano e rubricano por duplicado exemplar no lugar e data expresados.

O conselleiro de Cultura, Educación e
Universidade,



Román Rodríguez González

A Superiora do Mosteiro de Ferreira
de Pantón (Lugo)

Teresa Marcos Martínez

Teresa Marcos Martínez